

اوقات عمومی خبری

هفته‌لق سیاسی ، ادبی ، علمی غزته‌در

جلد : ۳

سنه : ۲ ۷ شعبان ۱۳۳۶ جمعه ایرتسی ۱۸ مایس ۱۹۱۸ نومرو ۳۷ — ۶۸

امصال فکر

عرق و ملت

دنیاك هان هر یرنده — الك آاز ایتالیا ده ، اوندن دها آاز یونانستانده — یهودی وار .
بونلرك تابعیتلری کی لسانلری ده آیریدر . یوکسك یهودی طبقه‌لری ، سچیة اصلیه‌لری
اولان عملیته خلل کلمه‌ك اوزره سا کن اولدقلری مملکتلرك یوکسك طبقه‌لرینی کندیله‌رینه
اورنك اتخاذا ایتشلر ؛ اونلرك کی اولمشلردر .

بونك ایکی مستثناسی واردر : روسیه‌ده کیلر و بزده کیلر . روسیه‌ده کیلرك اکثریتی ،
(آشکه‌نازیم) موسویلری ، بوزوق و (ییدیش ژارغونی) دنیلن بر آلمانجه ایله متکلمدرلر .
بزده کیلرك اکثریتی (سه‌فارادیم) بنی اسرائیلی بوزوق و (اسپانیول ژارغونی) دنیلن بر
اسپانیولجه ایله متکلمدرلر . بونلرك اقل‌قلیلی ترکلمکه تمثیل ایتمشدر . لکن ، فطرت اصلیه‌لری
مختل اولامشدر .

بومطالعاتی نیچون درمیان ایدیورز ، بیلمیسکز ؟ یهودیلر — ناسیون — مقابلی بر
« ملت » تشکیل ایتزلر . هر یرك یهودیسی ، مه‌ما ممکن ، اویرده سا کن ملت اعضاسندندر .
یهودیلرك هیئت مجموعه‌سی بر « دین » و بر « عرق » تشکیل ایدر . بر آمریکا یهودیسی ایله

بر له یهودیسی آرمسندہ تابعیت ، لسان ، عرفان ، عادت اشتراکی یوقدر . حالبوکه (آپیسقوپه لیئن) کلیسائنه مربوط بر آمریقائی ایله آمریقاده (ره فورمه) سیناغونه منسوب بر یهودی آرمسندہ وطنداشلق ، لسان ، عرفان ، عادت ، حتی حس اشتراکی واردر .

(قانادا) ده ایکی عرق ساکندر : فرانسر ، آنغلو - صاقسون . فقط ، حتی لسانلرینی و عرفانلرینی محافظه ایتمکله برابر ، بویکی عرق بر هیئت واحده تشکیل ایدیورلر . فرانسر قانادالیرک فی الواقع فرانسه فرانسلری ایله شرکت عرقیلری وار . لکن آرتق بونلرک شرکت ملیهلری قالمه دی .

دها ایلری کیده لم . اصل انکلیرله ، (آوسترالیا) ، (قانادا) ، (یکی زیله ند) ، (جنوبی آفریقا) ، (نی ژوفاؤندله ند) انکلیرلرینک شرکت ملیهلری مختل اولیور . بونلر کندیلرینی ، عینی عرق داخنده ، بشقه ملتلر فرض و تلقی ایتمکده درلر .

ملت ، بر (ره آلیته) در . (حال) ک ، (بوکون) ک افاده ایتدیکی بر حقیقتدر . بوکا ربط آمال ایتمکده ملتداشلرک بر منفعت بارزه سی واردر . هیچ بر کیسه ، الیوم ، بو جامعه دن آریله ماز .

وقتیله ، عالم نصرانیتده دین جامعه سی افرادی بر رایت آلتنده بولوندیران بر مفهوم ایدی . شیمدی ، غربده و بتون نصرانیت عالمنده بو مفهوم کهوشیور ؛ یرینه ملت مفهومی قائم اولیور . بویکی مفهوم مدن بری دها نظری ، دیکری دها عملی ؛ بری دها نجیب و علوی ، دیکری دها سیاسی واداریدر .

فقط (عرق) مفهومی هنوز (دین) و (ملت) مفهوملری قدر استعلایه صاحب حق دکلدنر . همده ، ماضیده هیچ بروقت ، اهمیت کسب ایتمه مشدی .

صوک زمانلرده استعلائی عرقی اوزرینه مستند بعض جریانلر حادث اولدی : (پان سلاویزم) ، (پان جرمانیزم) ، (پان آله نیزم) ، الی آخره ، کبی .

بونلرک بری برندن تفریقی لازمدر . (پان سلاویزم) تام بر اتحاد عرقی فرضیه سی ارئه ایدر . (موسقوف) ، (اوکراینالی) ، (له) ، (صرب) ، (خروات) ، (بوشناق) ، [تمیل اعتباریله] (بولغار) ، (چه) ، (سلوواک) ، (سلووهن) ، الی آخره . . . بونلرک

اسلاو اولدقلری حالدہ بربرندن مستقل ملتر تشکیل ایدیورلر. همده بوملتر آره سنده شدید خصوصملر موجوددر. له ایله موسقوف، قرابت عرقیه دن صرف نظر، تاریخی دشمندرلر. مصاهرت عرقیه ووصایت ابتدائیهدن صرف نظر روس، بولغار بربریه حرب ایتدیلر. اوقراینالیرله موسقوفلرده اوילה.

احوال بومرکزده ایکن پان سلاویزم آمانه مجلوب اولق روسیه ایمپراطورلغنی محو ایتدی. باقیکز بوفکر نه قدر مضر ایش!

(پان سهریزم) خولیاری، (پان سلاویزم) دن دهها عقله یاقین اولقله برابر صرب سلطنتک بادی فلاکتی اولدی. برطول امل، صرب ملتنی یاری یاریه ایندیردی!

(ملت) اقنومنک (عرق) مفهومنه ترجیحی هر حالده طوغری برمسکدر. چونکه ملت بر - ره آلیته - در. مهما ممکن برقطعه ارضده اقامت ایدیلور. لسان، متحددر ویا متحد کیدر. هاه منافع مشترکدر. آرده بر نظریه، بر خیال، اوزاق بر سیاست یوق. ایشته بونک ایچوندرکه ملیتک تقویه سی خصوصنه مصروف اولان همتر، اجتهادلر، بلا استثنا، موفقیتله تتوج ایدر. عرقک اتحادینه مصروف اولان هم ایسه - شیمدی یه دکن - بر نتیجه ویرمه مشدر.

عرق بعضاً ملت ایله تعارض ایدر. صفوت عرقیه کودیله جک اولورسه - بو ادماده بولونانلر بیله، آزیجق کندی قانلرخی قاریشدرنجه انکساره اوغرارلر. بر ملت، عروق مختلفه دن، اجناس متشتهدن، افراد متنوعه دن، کونا کون تصالباتدن، ضمیمه لردن، علاوه لردن، یامالردن، تصیرلردن مرکبدر. یکعرق ملتک مثالی آنجق قبائل ابتدائیهده آرانه بیلیر. هر ملت، آزچوق، غیر یکنسقدر.

صوکره... عجبا عرق نه دیمکدر؟ مطالعه مچه (عرق)، قدیم بر (ملت) دیمکدر. بر آمریقاییه نسبتله ملت، آمریقا ملتیدر. عرق ایسه، انکلزلکدر. انکلزلک ایسه بش اون عرقک امتزاجندن تحصیل ایش برکیتدر. (آغل)، (پیقت)، (کهلت)، (نورمان)، (سقوچ)، (کهیل)، (دان)، (ساغا)، (نوروج)، الی آخره کبی ملتک اصطفای ایش افرادی بر ایشمش، بیوک - بریتانیا آطه سی اوزرنده بر ملت تشکیل ایشدرکه بو، بوکونکی آمریقا ملتک عرقی، مصدریدر. عجبا، وقیله، (آغل)، (پیقت)، (کهلت) کبی،

انکیزلکک عناصر اصلیه سی اولان ملتارده ، کندیلرینه کوره بشقه ، دها ابتدائی ، دها اسکی ملتاردن متشکل دکلای ایدیلر؟ البته ! [۴]

اوحالده عرق بر - ره آلیته - ایسه ده بونک رتبه سی پک ایلریده دکلدن . بز شکل حاضره ، حقیقت حالیه یه ، بوکونکی وضعیته باقهلم .

عرق مفهومنه التفاتکار اولق ایچون سیاسی و دیپلوماتیق بر سبب بولونمق لازمدن . بردولت بوسیاسته مماشاث ایدرسه بونده بر منفعت و بر طاقم عرقداشلری تمیل ایتک قابلیت وامکاتی کورمه لیدر . اوحالده ، سیاست عرقیه ، درحال برسیاست ملیه یه انقلاب ایدر . یوقسه قورو کورولتی عرق طرفدارلخی بعضاً موجب مضرت اولور ؛ اولماسه بیله کولوچ بر شکل اکتساب ایدر .

برده ، بوکی افکارک اوان تعممنده سائر جریانلری ده نظر ابتصاره آلمق اقتضا ایدر . بریرده عرق پروپاگاندا سی یاسیلور و تضییقات اجرا ایدیلور کن عینی یرده ، ایچدن ایچه (قوزموپولیتیزم) جریانی ده باش کوستریور : صوکه زمانلرده روسیه چارلخی اولانجه قوتی (پان سلاویزم) و یردیکی حالده ، (بالشویق) لر یالکز عرق واسلاولق اقنومنی دکل ، ملیت مفهومنی بیله آیاقلر آلتنه آلدیلر .

[۴] عرق تبعاتنده فقدرایلری کیدیلیرسه ساحه اوقدرکنیشلیر . عالم ومتبع ، ساحل سزاوقیانوسلر ایچنده قالیر . مثلاً برملق آلیکزه طولایورسکز . بوملتک بر منشأ ومصدری وار دکلای؟ اورایه فکرأ هجرت ایدیورسکز . مکر اومنشأ ومصدردن چیقان دیگر افرادده وارمش . بونلرله قرابت ، هیچ اولمازسه برمصاهرت کشف ایتک ایشدن بیله دکلدن .

صوکره اوللاریکزله یاقالایه بیایدیککز عرق ده تدقیقه همت بیوریورسکز . اوکا نسبتله - عرق - اولان برهیئتدن ، دها اسکی زمانلرده بشقه شعبات آیرلش ، دها اول ، مهاجرت طریقله جهانک دیگر برکوشه سینه ، برقطعه سینه کیمش . نصل عاظه لر برشجره تشکیل ایدیورلرسه ملتارده ، طبقی اونک کی ، برشجره تشکیل ایدرلر . هر یاپراق داله ، هر دال آغاجه ، آغاجه کوکه ، کوکک بتون الیافی ایسه آغاجه و طولاییدسیله هر ایف ، هر داله مربوطدر . اوحالده تدقیقات عرقیه ده پک ایلریله کیده بیلیر . مصطفی جلال الدین پاشا زاده انور پاشا اسکندر کبیر ایله هم عرق اولدیفمزی ایلری به - - وره جک . هله فرانسز لک اجدادی اولان (غول) لک ، روس لک منشأی (سلاو) لک تورانیلیغنه ، بناء علیه ترک لکنه شک وشبه یوق . نته کیم ساح رفعت بکده زردشت مدیالی ایدی ، مدلرده تورانیلدرلر ؛ بناء علیه زردشت ترک دی ؛ هله هله آنه سنک اسمی (طوغدی) قادیندر ؛ نتیجه منطقیه سینه وارمشدی . لکن مسئله دها بیوک بر بساطته ارجاع اولونه بیلیر . نقلاً هرملت حضرت آدم وجناب حوا واه ووالده سزه ، تخمینات فنییه نظر آده جاواده مستحاثه سی کشف ایدیان (پیته قانتروپوس) و منجر اولیور : بنی آدم اعضای یکدیگرند

ایمپراطور (نهر) نك عهد استبدادنده روماللق نظریه سی زور بازو ایله بتون عالمه
نشر و اشاعه ایدیلیرکن ، (قاتاقونب) لرك ایچنده کیزی ، رطوبتلی مجهول مغاره لرده ،
جسمانیات علمنده ، جسمانیاتی ، روما ایمپراطورلغنی ییقه جق بین الملل ، فوق الملل نصرانیت
جریان کارنده موفق اولمش و وفاتندن برآز صوکره ، (پاولوس) کیسه نك قیلینه
طوقونه مدیخی قیصرلکی ییقمشدر .

آمان ، بوکی معظمت و معضلاتده یکجهت دوشونمك نه فنا شیدر ! نظریه ، نه آلم
عاقبتلری استلزام ایدر !

بشکطاش ۱۲ مایس ۱۹۱۸

مهرل نوری

هکبه لی آداده

ای چام لیانی ، ای دله مرسای سعادت !

ای لانه سبزین فسونکار محبت !

اظلال لطیفه کده کچن برقیصه جق دم

عالمده بنی ایلدی صوکه مرتبه خرم

ای ییلرک آلتنده اکمش ، قوجامش چام !

سایه کده سنک ایتدک اودلدار ایله آرام

اوتلراوزرنده اوزانوب یار کولرکن

کل روینه کوز یاشلری دوکمه کده ایدم بن

محرور دلی لطفنه غرق ایلر ایکن یار

حیفا بوکونی ایتدی سیه چرخ ستمکار

ای چام ؛ بوکوزل خاطره ذوقی صاقلا !

عالمده بنم بو بریجک شوقی صاقلا !

مصطفی رشید